

## **Shona - Vakadzi MuMagwaro - Wives Scriptures**

**VaEfeso 5:22-24** **Vakadzi, muzviise pasi pavarume venyu sezvamunoita kuna She.** 23 Nokuti murume musoro womukadzi saKristu ari musoro wekereke, iwo muvir wake, iyo yaari muponesi wayo. 24 Zvino sezvo kereke ichizviisa pasi paKristu, saizvozvovo vakadzi vanofanira kuzviisa pasi pavarume vavo pazvinhu zvose.

**VaEfeso 5:31,33** “**Nokuda kwaizvozvi, murume achasiya baba namai vake uye asanganiswe nomukadzi, uye vaviri vachava nyama imwe chete.**” 33 Kunyange zvakadaro, mumwe nomumwe wenyuwo anofanira kuda mukadzi wake **sezvaanozvida iye, uye mukadzi anofanira kuremekedza murume wake.**

**1 VaKorinde 7:3-5** Murume ngaape mukadzi wake zvakafanira, uye nomukadzi adarowo kumurume wake. 4 Muviri womukadzi hauzi wake oga asi kuti ndowomurume wakewo. Zvimwe chetezvo, muvir womurume hauzi wake oga asi kuti ndowomukadzi wakewo. 5 Musanyimana, kunze kwokunge matenderana uye kwenguva duku, kuti mumbova nenguva yokunyengetera. Mushure mezvo mosanganazve kuitira kuti Satani arege kukuedzai pakusazvidzora kwenyu.

**1 VaKorinde 7:34** uye zvaanoda zvakapatsanurwa. Mukadzi asina kuwanikwa kana mhandara anofunga nezvaShe: Chinangwa ndechokuzvipira kuna She panyama napamweya. Asi mukadzi akawanikwa anofunga zvenyika ino kuti angafadza murume wake sei.

**VaKorose 3:18** **Vakadzi, zviise pasi pavarume venyu, sezvazvakafanira muna She.**

**1 Timoti 2:11-15** Mukadzi ngaadzidze akanyarara uye nokuzviisa pasi kwose. 12 Handitenderi kuti mukadzi adzidzise kana kuti ave nesimba pamusoro pomurume; anofanira kunyarara. 13 Nokuti Adhamu ndiyе akatanga kuumbwa, tevere Evha. 14 Uye Adhamu haasi iye akanyengerwa; mukadzi ndiyе akanyengerwa uye akava mutadzi. 15 Asi vakadzi vachaponeswa nokubereka vana kana vachirambira mukutenda, murudo noutsvene, uye nokuzvidzora.

**Genesici 3:16** Kumukadzi akati, “Ndichawedzera kwazvo kurwadziwa kwako mukubereka vana; uchabereka vana mukurwadziwa. Kuda kwako kuchava kumurume wako, uye achava nesimba pamusoro pako.”

**1 Petro 3:1-6** **Saizvozvo nemiwo vakadzi, muzviise pasi pavarume venyu kuiitira kuti, kana mumwe wavo asingatendi shoko, angadzorwa namafambiro avakadzi vavo pasina shoko rarehwa,** 2 pavanoona

**kuchena nokuremekedzwa kwoupenyu hwenyu.** 3 Runako rwenyu ngarurege kubva pakushonga kwokunze, kwakadai sebvudzi rakarukwa uye nokushonga zvishongo zvegoridhe nenguo dzakaisvonaka. 4 Asi, runofanira kuva rwomunhu womukati, iko kunaka kusingaori kwounyoro nokwomweya wakapfava, kunova ndiko kunokosha pamberi paMwari. 5 Nokuti vaizvishongedza saizvozvi vakadzi vatsvene vakare avo vaiisa tariro yavo muna Mwari. Vakanga vachizviisa pasi pavarume vavo chaivo, 6 saSara, akateerera Abhurahama akamuti ishe wake. Muri vanasikana vake kana muchiita zvakanaka uye musingapi kutya nzvimbo.

**Tito 2:1-5 Unofanira kudzidzisa zviri maererano nedzidziso yakarurama.** 2 Dzidzisa varume vakuru kuti vave vanozvibata, vakafanira kukudzwa, vanozvidzora, uye vakarurama pakutenda naparudo uye nomukutsungirira. 3 Saizvozvovo, dzidzisa vakadzi vakuru kuti vave nomufambiro wakafanira, vasingacheri, kana kuda waini zhinji, asi kuti vadzidzise zvakanaka. 4 Uye kuti vadzidzise vakadzi vaduku kuti vade varume vavo navana vavo, 5 kuti vave vanozvidzora uye vakachena, vanoshanda kumba, vave vanyoro uye kuti vazviise pasi pavarume vavo, kuitira kuti pashayikwe angazvidza shoko raMwari.

**1 VaKorinde 11:5-7,10** Uye mukadzi mumwe nomumwe anonyengetera kana kuprofita musoro wake usina kufukidzwa, anoninipisa musoro wake, zvakangofanana nokuva nomusoro wakaveurwa. 6 Kana mukadzi asingafukidzi musoro wake, anofanira kugera bvudzi rake; asi kana zvichinyadzisa mukadzi kuti agerwe bvudzi rake, anofanira kufukidza musoro wake. 7 Murume haafaniri kufukidza musoro wake, sezvo ari mufananidzo nokubwinya kwaMwari; asi mukadzi kubwinya kwomurume. 10 Nokuda kwechikonzero ichi, uye nokuda kwavatumwa, mukadzi anofanira kuva nechiratidzo chesimba pamusoro wake.

**Fananidzo - Zvirevo 12:4** Mudzimai ane unhu hwakanaka ikorona kumurume wake, asi mudzimai anonyadzisa akafanana nokuora mumapfupa omurume wake.

**Fananidzo - Zvirevo 14:1** Mukadzi akachenjera anovaka imba yake, asi benzi rinoputsa imba yaro namaoko aro.

**Fananidzo - Zvirevo 19:13** Mwanakomana benzi ndiko kuperara kwababa vake, uye mukadzi anokakavara akafanana nemvura inoramba ichingodonha.

**Fananidzo - Zvirevo 21:9,19** Zviri nani kugara pakona yedenga remba, pano kugara mumba nomudzimai anokakavara. 19 Zviri nani kugara mugwenga, pano kugara nomudzimai anokakavara uye ane hasha.

**Fananidzo - Zvirevo 25:24** Zviri nani kugara pakona redenga reimba pano

**kugara mumba nomudzimai anokakavara.**

**Fananidzo - Zvirevo 27:15,16** Mudzimai anokakavara akafanana nemvura inoramba ichidonha-donha mushure mokunge kwanaya; 16 kumudzivisa zvakafanana nokudzivisa mhepo, kana kuchingidzira mafuta noruoko.

**Fananidzo - Zvirevo 31:10-31** Mudzimai ane unhu hwakanaka ndiani angamuwana? Mutengo wake unopfuura nokure matombo anokosha emarubhi. 11 Murume wake anovimba naye zvizere, uye haana chaanoshayiwa chinokosha. 12 Anomuitira zvakanaka, kwete zvakaipa, mazuva ose oupenyu hwake. 13 Anosarudza wuru neshinda uye anoshanda namaoko anoshingaira. 14 Akafanana nezvikepe zvavatengesi, anondotora zvokudya zvake kure. 15 Anomuka kuchakasviba; agotsvagira mhuri yake zvokudya nokupa varandakadzi vake basa ravo. 16 Anonan'anidza munda agoutenga; anosima munda wemizambiringa nezvaakawana namaoko ake. 17 Anoita basa rake nesimba; kuti aite maoko ake akasimba mabasa ake. 18 Anoona kuti kushambadzira kwake kunobatsira, uye mwenje wake haudzimi pausiku. 19 Muruoko rwake anobata chirukiso, uye anobata chirukwa neminwe yake. 20 Anotambanudzira maoko ake kuvarombo, uye anotandavadzira maoko ake kune vanoshayiwa. 21 Kana kwotonhora, haatyire mhuri yake; nokuti vose vakapfeka nguo dzinodziya. 22 Anozvigadzirira zvokuwaridza panhoo yake; anozvipfekedza nguo yomucheka wakaisvonaka, uye nomucheka wepepuru. 23 Murume wake anoremekedza pasuo reguta, kana agere pakati pavakuru venyika. 24 Anoita nguo dzemicheka yakanaka agodzitengesa, uye anotengesera vanotengesa micheka yokumonera muhuro. 25 Simba nokukudzwa ndizvo nguo dzake; anofara akatarisana namazuva anouya. 26 Anotaura nouchenjeri, uye kurayira kwakatendeka kuri parurimi rwake. 27 Anotarira zvakanaka mararamiro emhuri yake, uye haadyi zvokudya zvousimbe. 28 Vana vake vanosimuka vagomuti akaropafadzwa, murume wakewo, anomurumbidza: 29 "Vakadzi vazhinji vanoita zvinhu zvakanaka, asi iwe unovakunda vose." 30 Zvinofadza zvinonyenger, uye runako runopera; asi mukadzi anotya Jehovha anofanira kurumbidzwa. 31 Mupeiwo mubayiro wake waakashandira, uye mabasa ake ngaamupe kurumbidzwa pasuo reguta.